

ՌՈՒՍԱՍՏԱՆԻ ԴԱՇՆՈՒԹՅԱՆ ԵՎ ԱԴԻԲԵՋԱՆԻ ՀԱՆՐԱՊԵՏՈՒԹՅԱՆ ՓՈԽՀԱՐԱԲԵՐՈՒԹՅՈՒՆՆԵՐԻ ԶԱՐԳԱՑՄԱՆ ԴԻՆԱՄԻԿԱՆ 2013Թ.

*Մարութ Վարդազարյան**

Բանալի բառեր՝ եվրասիական միջանցք, Կասպյան ավազան, բազմակենտրոն աշխարհակարգ, խնդրահարույց Ադրբեջան, ռուս-ադրբեջանական հարաբերություններ, Իրանական Ադրբեջան:

Մերձավոր Արևելքում և Հարավային Կովկասում առկա հակամարտությունները, 2014թ. Աֆղանստանից դաշնադրային զորքերի դուրսբերումը Կենտրոնաասիական տարածաշրջանում և Կասպյան ավազանում ուրվագծում են նոր մարտահրավերներ ու սպառնալիքներ: Հարավկովկասյան երկրներն աստիճանաբար ընդգրկվում են անվտանգության միջազգային համակարգերում՝ ինչպես երկկողմ, այնպես էլ բազմակողմ չափումներով, և ստիպված են հաշվի նստել ոչ միայն իրենց անմիջական հարևանների՝ ՌԴ, Թուրքիայի ու Իրանի, այլև ԱՄՆ ու ԵՄ շահերի հետ: Այս բոլոր երկրներն իրենց հետաքրքրությունն ու շահերն ունեն Ադրբեջանում, քանի որ այդ երկիրը Կասպից ծովի և եվրասիական միջանցքում ռազմավարական կարևոր դիրք է զբաղեցնում՝ սահմանակցելով Ռուսաստանին, Իրանին, Թուրքիային, Վրաստանին ու Հայաստանին, ինչպես նաև հարուստ է էներգակիրներով և տնտեսական մեծ ներուժ ունի [1, c. 42]: Փորձագետների կարծիքով՝ Կասպյան ավազանին բաժին է ընկնում նավթի

* ԵՊՀ միջազգային հարաբերությունների և դիվանագիտության ամբիոնի վարիչ, պ.գ.թ., դոցենտ:

համաշխարհային պաշարների 10%-ը, Ռուսաստանին՝ 6-10%-ը, իսկ Մերձավոր Արևելքի երկրներին՝ 60%-ը [2, с. 198]: ԱՊՀ երկրների ինստիտուտի փորձագետների կարծիքով՝ Ադրբեջանի նավթի պաշարները կազմում են 3.5-5 մլրդ տոննա, իսկ գազինը՝ 600 մլրդ մ³ [3, с. 244]: Չնայած մոտակա հեռանկարում էներգակիրների արտահանման ծավալով Կասպյան շրջանը չի կարող մրցակցել Պարսից ծոցի երկրների հետ, և Ադրբեջանն էլ համաշխարհային նավթային շուկայում չի կարող դառնալ լուրջ դերակատար, այնուամենայնիվ, Ադրբեջանի նշանակությունը ԱՄՆ-ը և ԵՄ-ը կարևորում են նաև այն հանգամանքով, որ այդ երկիրը կարող է տարանցիկ գոտի հանդիսանալ Կենտրոնական Ասիայի ածխաջրածնային պաշարները միջազգային շուկա արտահանելու համար՝ շրջանցելով Ռուսաստանը և Իրանը: Հասկանալի է, որ տարածաշրջանում ընթացող գործընթացներն ուղղակի առնչվում են Ռուսաստանի աշխարհաքաղաքական և աշխարհատնտեսական շահերի հետ, և 2012թ. մարտին ՌԴ նախագահ ընտրված Վ.Պուտինը պետք է համապատասխան քայլեր ձեռնարկեր այդ ուղղությամբ:

2012թ. մայիսի 7-ին Վ.Պուտինը ստորագրեց Ռուսաստանի Դաշնության արտաքին քաղաքականության կուրսի իրականացման միջոցառումների մասին հրամանագիրը, ուր նշվում էր, որ ձևավորվող բազմակենտրոն նոր աշխարհակարգում ՌԴ-ն իր ազգային շահերն ապահովելու համար պետք է վարի պրագմատիկ, բաց և բազմավեկտոր քաղաքականություն: ԱՊՀ երկրների հետ բազմակողմ ինտեգրման քաղաքականության զարգացումը համարվում է ՌԴ արտաքին քաղաքականության կարևորագույն խնդիրներից մեկը: Հրամանագրում կարևորվում էր նաև ԵԱՀԿ Մինսկի խմբի շրջանակներում ԼՂ հակամարտության կարգավորման ուղղությամբ ՌԴ հետևողական քաղաքականության շարունակումը¹: Վ.Պուտինը 2012թ. մարտին ՌԴ

¹ Указ В.В. Путина “О мерах по реализации внешнеполитического курса Российской Федерации” от 7 мая 2012г., www.kremlin.ru/acts/15256

նախագահ ընտրվելուց հետո հարավկովկասյան տարածաշրջանում առաջինը այցելեց Բաքու: Մինչև 2013թ. ռուս-ադրբեջանական երկկողմ հարաբերություններին անդրադառնալը, հարկ ենք համարում ընդգծել երկու հանգամանք: Առաջին. եթե խոսում ենք ռուս-վրացական հարաբերությունների մասին, ապա Հայաստանը և Ադրբեջանն ավելի ածանցյալ նշանակություն ունեն: Նույնը չի կարելի պնդել ռուս-ադրբեջանական կամ ռուս-հայկական հարաբերությունների մասին, որտեղ երրորդ կողմի (Երևանի կամ Բաքվի) «ներկայությունը» մշտական է: Երկրորդ. ռուս-ադրբեջանական հարաբերությունների ուրույն ձևաչափի հստակեցումը սկսվեց դեռևս Վ.Պուտինի առաջին նախագահության օրոք: ՌԴ նախագահի պաշտոնակատար նշանակվելուց (առաջին անգամ նախագահ է ընտրվել 2000թ. մարտին) մեկ օր առաջ՝ 1999թ. դեկտեմբերի 30-ին, Վ.Պուտինը հանդես եկավ «Ռուսաստանը հազարամյակների սահմանագծին» ծրագրային հոդվածով, ուր շարադրեց Ռուսաստանի զարգացման հեռանկարների վերաբերյալ իր տեսակետները [4]: 2000թ. հունիսին ՌԴ նախագահը հաստատեց Ռուսաստանի Դաշնության արտաքին քաղաքականության հայեցակարգը, ուր կարևորվում է ԱՊՀ երկրների հետ բազմակողմ և երկկողմ հարաբերությունների զարգացումը, ինչպես նաև ԱՊՀ տարածքում հակամարտությունների կարգավորումը¹: Եվ իրոք, Վ.Պուտինի նախագահ դառնալուց հետո ռուս-ադրբեջանական հարաբերությունները թևակոխեցին նոր փուլ: Կարևորելով Կովկասն ու Կասպյան ավազանը՝ Վ.Պուտինն առաջին ՌԴ նախագահն էր, որ 2001թ. հունվարին ժամանեց Բաքու (ՌԴ առաջին նախագահ Բ.Ելցինը պաշտոնական այցով չի եղել Ադրբեջանում), այցելեց Շահիդների ծառուղի: Ադրբեջանը կասպյան տարածաշրջանի միակ երկիրն է, որ Կասպից ծովի իր հատվածի նկատմամբ իրավունքն ամրագրել էր 1995թ. ընդունված սահմանադրությամբ (հոդված 11, կ. 2) և կոդով էր ջրային հատվածը և ընդերքը բաժանել ըստ ազգային սեկտորների: Փոփոխելով իր նախ-

¹ www.mid.ru/Bl.nsf/arh/19DCF6/BEFED1134325699Coo3B5FA?OpenDocument

կին դիրքորոշումը և համաձայնելով այդ մոտեցմանը՝ 2002թ. սեպտեմբերի 23-ին ՌԴ-ն և Ադրբեջանի Հանրապետությունը (ԱՀ) սահմանագատեցին Կասպից ծովի իրենց հատվածները: Ի տարբերություն ԱՄՆ-ի և ԵՄ-ի, Մոսկվան առաջինն անվերապահորեն ճանաչեց 2003 և 2005թթ. Ադրբեջանում կայացած խորհրդարանական ընտրությունների արդյունքները: Նույնիսկ զարմանալի իրավիճակ ստեղծվեց, երբ ԱՊՀ գործադիր քարտուղար Վլադիմիր Ռուշայլոն, որը 2005թ. ընտրությունների ժամանակ գտնվում էր Բաքվում, մինչև Ադրբեջանի Ընտրական հանձնաժողովի պաշտոնական հայտարարությունը՝ շտապեց հրապարակել, որ «Ադրբեջանում ընտրությունները կայացել են»¹:

Այսպիսով, 2013թ. օգոստոսի 13-ին Վ. Պուտինի այցելությունը Բաքու նրա վերստին նախագահ ընտրվելուց հետո առաջին այցն էր Ադրբեջան, սակայն եթե նկատի ունենանք, որ վերջին այցելությունը տեղի էր ունեցել 7 տարի առաջ, ապա կարող ենք փաստել, որ ռուս-ադրբեջանական հարաբերություններում առկա էին որոշակի բարդություններ և լարվածություն, ինչը դրսևորվեց Գաբալայի ՌՏԿ վարձակալության կասեցմամբ, Բաքու-Նովոռոսիյսկ նավթախողովակաշարի շահագործման դադարեցմամբ: Որպես պատասխան քայլ Ռուսաստանում ստեղծվեցին Բաքվի վերահսկողությունից դուրս ադրբեջանական սփյուռքի նոր կառույցներ, ՌԴ քաղաքացի Ռուստամ Իբրահիմբեկովը քայլեր ձեռնարկեց Ադրբեջանի նախագահական ընտրությունների նախօրյակին դառնալ ընդդիմության միասնական թեկնածու և այլն: Չնայած Ադրբեջանը փորձում է չհարել ոչ մի բևեռի (ի տարբերություն Վրաստանի, որն ակտիվորեն ձգտում էր դեպի ՆԱՏՕ և ԵՄ, իսկ Հայաստանը ՌԴ ռազմավարական դաշնակիցն է ու ՀԱՊԿ անդամ), այնուամենայնիվ, տարածաշրջանում տևական մի ժամանակաշրջան Մոսկվայի համար ամենախնդրահարույց երկիր հանդիսացել է ոչ թե Վրաստանը, այլ Ադրբեջանը: Ադրբեջանն ընդգրկվել է

¹ Итоги с Владимиром Путиным: Внешняя политика. Часть 1, Россия на постсоветском пространстве, <http://www.spn.ru/library/print19832.htm>

ՎՈՒԱՄ կազմակերպությունում, սակայն ցանկանում է ոչ թե ընտրություն կատարել, այլ հաշվեկշռելով տարբեր կողմերի միջև՝ շրջանցել Արևմուտքի կողմից «ժողովրդավարության քննությունները» և հանդիսանալ էներգետիկ այլընտրանքային միջանցք ԵՄ-ի համար: Անդրադառնալով Ադրբեջանի համար նախընտրելի համագործակցության մոդելներին, ինչպես նաև ինտեգրացիայի ու ինքնիշխանության համադրմանը, ԱՀ նախագահ Ի.Ալիևն ասել է, որ երկրների մի մասն իր ընտրությունն արդեն կատարել է: Նման ինտեգրման օրինակներ նա համարում է Եվրամիությունը և Մաքսային միությունը: Այնուհետև նա հայտարարում է, որ Ադրբեջանի համար ինքնիշխանության հարցը քննարկման ենթակա չէ, և իրենք կողմ են 100% ինքնիշխանության: Այն չի ենթադրում, որ տարածաշրջանային գործընթացներում Ադրբեջանը դիտորդի դերում հայտնվի, սակայն Բաքուն կարևորում է այնպիսի տնտեսական համագործակցությունը, որը չի ենթադրում երկրի տնտեսական ինքնիշխանության թեկուզ մի մասի փոխանցումը վերալետական միություններին և կառույցներին [5]:

Ռուսական կողմի համար այցի պահը բարեհաջող էր ընտրված: «Հյուսիս-Հարավ» քաղաքական հետազոտությունների կենտրոնի տնօրեն Ալեքսեյ Վլասովը գտնում է, որ Ադրբեջանի նախագահական ընտրությունների նախօրյակին Վ.Պուտինի այցը Բաքու՝ աջակցություն էր Ի.Ալիևի վարչակարգին¹: Եվ իրոք, պետական ղեկավարներից Վ.Պուտինը միակն էր, որ ընտրություններից առաջ հանդիպեց Ի.Ալիևին, ինչը վերջինիս գորակցելու և հետընտրական շրջանում «պարտքերը մարելու» ակնկալիք էր հետապնդում: Հասարակական-քաղաքական հետազոտությունների կենտրոնի տնօրեն Վլադիմիր Եվսենը նա գտնում է, որ այդ այցը վկայում է այն մասին, որ Մոսկվան շահագրգռված է լուծել ռուս-ադրբեջանական հարաբերություններում կուտակված խնդիրները²:

¹ Визит Путина в Баку, www.vestikavkaza.ru/analytics/vizit-Putina-v-Baku.html

² www.vestikavkaza.ru/video/Evseev-o-vizite-Putina-v-Baku.html

ՌԴ նախագահի այցի պահը բարենպաստ էր ընտրված նաև այն պատճառով, որ 2013թ. թուլացավ ուժային կենտրոնների ուշադրությունը Հարավային Կովկասի և մասնավորապես Լեռնային Ղարաբաղի հակամարտության նկատմամբ: Վաշինգտոնի համար այժմ ավելի առաջնային են սիրիական իրադարձությունները, Աֆղանստանից ամերիկյան զորքերի դուրսբերման մեխանիզմների մշակումը, Լիբիայում, Եգիպտոսում իրավիճակի անկայունությունը, Իրանի հետ երկխոսության զարգացումը և վերջապես՝ Վրաստանում իշխանափոխության կարգավորումը: Ինչ վերաբերում է Եվրամիությանը, ապա այն Հարավային Կովկասում (ի տարբերություն Ուկրաինայի և Մոլդովայի) չունի հստակ ձևավորված մարտավարություն: Մինսկի խմբի անդամներից Հարավային Կովկասում (ՀԿ) համեմատաբար ակտիվորեն գործում է ՌԴ-ն: ԵՄ Ասոցացման համաձայնագիրը «շրջանցում» է Ադրբեյջանը, իսկ անվտանգության տեսանկյունից այն տարածաշրջանի երկրներին որևէ երաշխիք չէր տալիս: Ընթացող վրաց-ռուսական երկխոսությունը ևս առայժմ մեծ հեռանկարներ չի խոստանում: Ավելին, նորագույն շրջանում Վրաստանում առաջին անգամ խաղաղ ճանապարհով իշխանության հանձնումը ոչ միայն չթուլացրեց Վրաստանի դիրքերն Արևմուտքում, այլև ճիշտ հակառակը՝ Եվրամիությունը և ԱՄՆ-ը հավանություն տվեցին դեպքերի նման զարգացմանը: Ընտրություններից հետո չընդհատվեց Արևմուտքի համագործակցությունը Վրաստանի հետ: Օրինակ, 2015թ. Վրաստանը կընդգրկվի ՆԱՏՕ Արագ արձագանքման ուժերում: Նախագահական ընտրությունները ցույց տվեցին, որ ռուսական աջակցությունը վայելող Նինո Բուրջանաձեի օգտին քվեարկեց բնակչության 10%-ը, և ռուսական կողմնորոշում ունեցող որևէ քաղաքական ուժ մոտ ժամանակաշրջանում դժվար թե էական դերակատարում ունենա [6, c. 33]:

Ռուս-ամերիկյան հարաբերությունների ճանաչված փորձագետ Արիել Բոենը գտնում է, որ Վ.Պուտինի այցը Բաքու նպատակ էր հե-

տապնդում նաև ԱՄՆ-ին ցուցադրել, որ ԱՊՀ տարածքը Ռուսաստանի համար հանդիսանում է «արտոնյալ տարածք», և Մոսկվան փորձում է օգտվել այն հանգամանքից, որ ԱՄՆ-ը 2008 թվականից կրճատել է իր ներկայությունն այդ տարածաշրջանում¹: Վ.Պուտինի այցելության աշխարհաքաղաքական ուղղվածությունը կապված է նաև իրանական խնդրի հետ, քանի որ ԻԻՀ նոր նախագահ Հասան Ռուհանիի ընտրվելուց հետո հարաբերությունները նոր ձևաչափով զարգացնելու հնարավորություն է ստեղծում: Միայն 2013թ. ընթացքում Իրանն ու Ադրբեջանը բողոքի 10 նոտա են փոխանակել: Այս հարցում Ադրբեջանը ևս Մոսկվայի աջակցության կարիքն ունի: Ռուս քաղաքագետ Լև Վերշինինը գտնում է, որ ԱՄՆ հրահրմամբ Իրանում կարող են սկիզբ առնել ադրբեջանա-պարսկական ընդհարումներ, և եթե Ի.Ալիևը հրապուրվի ամերիկյան «Հարավը (Ատրպատականը) Ղարաբաղի փոխարեն» խայծով, ապա Իրանական Ադրբեջանի նկատմամբ ավելի աշխարհիկ Ադրբեջանը կկլանվի առավել մեծաթիվ ու մոլեռանդ ազգակիցների կողմից: Դեպքերի նման զարգացման դեպքում, Լ.Վերշինինի կարծիքով, Բաքվի ներկայիս իշխանություններն իրենց անվտանգությունն ապահովելու համար պետք է խնդրեն Կրեմլին, որպեսզի ռուսական զինված ուժերը տեղակայվեն ադրբեջանա-իրանական սահմանի երկարությամբ [7, c. 114]:

Ի՞նչ խնդիրներ են ծառացել Ադրբեջանի ներկայիս ղեկավարության առջև, որոնք նա փորձում է լուծել՝ շահարկելով իր աշխարհագրական բարենպաստ դիրքը և էներգետիկ գործոնը: Դրանք հետևյալն են՝ «վերադարձնել» Լեռնային Ղարաբաղը, կանխել Իրանի հետ հակասությունների խորացումը, Բաքուն դարձնել տարածաշրջանային առևտրի հանգուցային կենտրոն և նվազագույնի հասցնել արտաքին ճնշումները Ալիևյան կլանի ներքին քաղաքականության վրա: Այս տեսանկյունից կարևորվում է արտաքին հավասարա-

¹ Ariel Cohen, Putin Drops in, America Drops Out, nationalinterest.org/commentary/

կշռված քաղաքականությունը: Ամրապնդելով իր ռազմավարական գործընկերությունը Թուրքիայի հետ՝ Ադրբեջանն աշխատում է բարելավել նաև հարաբերությունները ՌԴ-ի հետ՝ միաժամանակ պահպանելով և զարգացնելով հարաբերություններն Արևմուտքի հետ: Վ. Պուտինը Բաքվում նշեց, որ ՌԴ-ն հանդիսանում է Ադրբեջանի երկրորդ առևտրատնտեսական գործընկերը: 2012թ. երկու երկրների միջև առևտրի ծավալը կազմել է \$3.4 մլրդ: 2013թ. հունվար-մայիս ամիսներին, անցած տարվա նույն ժամանակահատվածի համեմատ, առևտրի ծավալն աճել է 50%-ով, Վ. Պուտինի վկայությամբ՝ ավելի քան 70 ռուսական շրջաններ տնտեսական սերտ կապեր են հաստատել Ադրբեջանի հետ, և ավելի քան 500 ռուսական ընկերություններ ակտիվորեն աշխատում են այդ հանրապետության ավտոմոբիլային, էներգետիկ և ֆինանսական բնագավառներում¹:

Դեռևս 2009թ. Ադրբեջանի պետական նավթային ընկերության (SOCAR) և ռուսական «Գազպրոմ»-ի միջև կնքված պայմանագրի համաձայն՝ Ադրբեջանը բնական գազ է արտահանում ՌԴ: Վ. Պուտինը նշեց նաև, որ ավելի քան մեկ միլիոն էթնիկ ադրբեջանցիներ հանդիսանում են ՌԴ քաղաքացիներ, և նույնքան ադրբեջանցիներ աշխատանքային գործունեություն են ծավալել Ռուսաստանում²: Ադրբեջանի արտաքին տնտեսական կապերի մասնաբաժնում ՌԴ մասնաբաժինը 15% է: Ադրբեջանցի քաղաքագետ և Միլի մեջլիսի պատգամավոր Ռասիմ Մուսաբեկովի կարծիքով՝ Մաքսային միությանն անդամագրվելու հեռանկարը դեռևս Ադրբեջանի համար հրապուրիչ չէ, և ամենաճիշտ դիրքորոշումը սպասողական դիրք ընդունելն ու հետևելն է, թե այն ինչքանով ձեռնտու կլինի Ադրբեջանի համար՝ սառնասրտորեն հաշվարկելով բոլոր պլյուսներն ու մինուսները³: Ադրբե-

¹ Richard Weitz, Global Insights: Putin's Baku Visit Highlights Complex Russia-Azerbaijan Ties – www.worldpoliticsreview.com/articles/13175/

² Ariel Cohen, Putin Drops in, America Drops Out, nationalinterest.org/commentary/

³ www.vestikavkaza.ru/news/44201.html

ջանը տարածաշրջանային երկրներից, թերևս, միակն է, որ չի փորձում նույնիսկ դրսևորել «ժողովրդավարության իմիտացիա», սակայն Արևմուտքի կողմից չի արժանանում քննադատության, քանի որ դեռևս 1994 թվականից էներգետիկայի բնագավառում Արևմուտքի հետ հաստատել է ռազմավարական համագործակցություն, իսկ Բաքու-Թբիլիսի-Ջեյհան խողովակաշարը և Բաքու-Թբիլիսի-Էրզրում գազամուղը մեծացրին Ադրբեջանի՝ որպես «էներգետիկ այլընտրանքի», դերը: Միանգամայն իրավացիորեն Ն.Նարոչնիցկայան նշում է, որ «աշխարհատնտեսությունը նոր երևույթ է, որը պետության և խոշոր անդրազգային ֆինանսական կառույցների ջանքերի միավորումն է՝ նպատակ ունենալով վերակողմնորոշել խոշոր տարածաշրջանները դեպի միանգամայն նոր գործընկերներ և փոխել դարերով ձևավորված իրավիճակը: Վերցնենք, օրինակ, Բաքու-Ջեյհան խողովակաշարը: Այս բնագավառի բոլոր մասնագետները միաձայն նշում են, որ այդ նախագիծը տնտեսական տեսանկյունից համաշխարհային նավթագոյացման գների վրա ոչ մի էական ազդեցություն չունի: Այն մաքուր քաղաքականություն է» [8, c. 234]:

Ռուս-ադրբեջանական փոխհարաբերությունների պրագմատիկ օրինակ է նաև գազային բնագավառում ոչ միայն մրցակցությունը, այլև համագործակցությունը: Մոսկվան ըմբռնումով մոտեցավ Բաքվի դիրքորոշմանը, որի արդյունքում *Nabucco* նախագծի փոխարեն առաջ քաշվեց Տրանսադրիատիկ խողովակաշարը (*TAP*): Դեռևս 2010թ. սեպտեմբերին ՌԴ նախագահ Դ.Մեդվեդևը ադրբեջանական իշխանությունների հետ կնքեց պայմանագիր, համաձայն որի՝ «Գազպրոմը» կրկնակի ավելի շատ ադրբեջանական գազ պետք է գներ՝ վճարելով ԱՊՀ տարածքում ամենաբարձր գինը՝ \$270 հազար մ³-ի համար: Ռուսական կողմը պարտավորվեց գնել նաև ադրբեջանական գազի ողջ ավելցուկը, միայն թե այն բաժին չհասնի *Nabucco*-ին: *TAP* նախագծում Մոսկվան ուներ նաև իր բոնուսները, քանի որ

«Ռոսնեֆտը» ևս ընդգրկված էր «Ապշերոն» գազի հանքավայրերի յուրացման նախագծում¹:

2013թ. դեկտեմբերի 13-ին Բաքվում ստորագրվեց «Շահդենիզ-2» գազակոնդենսատային հանքավայրի մշակման նախագծի համաձայնագիրը, որն ադրբեջանական մամուլն անվանեց «Դարի երկրորդ պայմանագիր» (առաջինը՝ 1994թ. սեպտ.) [9]: Ներդրումները կատարելու է բրիտանական BP ընկերությունը (մոտ \$60 մլրդ), և Ադրբեջանն իր 10% մասնաբաժնից շահույթ կստանա այն ժամանակ, երբ փոխհատուցվեն BP ծախսերը [9]: Դեռևս 2011թ. դեկտեմբերին Ադրբեջանը և Թուրքիան ստորագրեցին հոչակագիր 2000 կմ Տրանսանատոլիական գազատարի (TANAP) կառուցման մասին: Իհարկե, այդ գազատարը նույնպես շրջանցելու է ռուսական տարածքները, սակայն Մոսկվային «չբարկացնելու» համար Ադրբեջանի արդյունաբերության և էներգետիկայի նախարար Նաթիգ Ալիևը հայտարարեց, որ Ադրբեջանը շահագրգռված չէ, որպեսզի Ուկրաինան մասնակցի այդ նախագծին: 2012թ. աշնանը Ուկրաինայի վարչապետ Ն.Ազարովը ցանկություն էր հայտնել, որպեսզի Ուկրաինան մասնակցի այդ նախագծին՝ հույս ունենալով դեպի Ուկրաինա Բուլղարիայի և Ռումինիայի տարածքով այլընտրանքային գազատար կառուցել²: Այսպիսով, նախագծի իրականացումը ոչ միայն ֆինանսական, այլև քաղաքական դիվիդենդներ կբերի Բաքվին՝ որպես և՛ Արևմուտքի, և՛ ՌԴ Կասպյան տարածաշրջանի կարևոր գործընկերոջ:

ՀՀ նախագահ Ս.Սարգսյանի՝ 2013թ. սեպտեմբերի 3-ին Մաքսային միությանը միանալու վերաբերյալ հայտարարությունը վերաբերում էր ոչ միայն ՀՀ-ՌԴ և ՀՀ-ԵՄ փոխհարաբերություններին, այլև ունեցավ տարածաշրջանային ազդեցություն: Ադրբեջանի որոշ քաղաքական շրջանակներում այն ընկալվեց որպես ԼՂ ներկայիս կարգավիճակն ամրապնդելու ևս մի լրացուցիչ փորձ: Բաքվում լավ

¹ kavpolit.com/visit-putina-v-baku/

² rus.newsru.ua/finance/19jun2013/tanap_gh.html

են ըմբռնում, որ տարածաշրջանում ԵՄ-ը ոչ միայն զիջում է ՌԴ-ին իր ռազմաքաղաքական ներկայությամբ, այլև ԼՂ հակամարտության վերաբերյալ չունի հստակ ձևավորված մոտեցում: Արդյոք ՀՀ այս քայլերից հետո տարածաշրջանում կթուլանա՞ն Ադրբեջանի դիրքերը, և այլընտրանք չունենալով՝ Բաքուն ավելի սերտ հարաբերություններ կհաստատի ՆԱՏՕ-ի, ԱՄՆ-ի և ԵՄ-ի հետ: Կարծում ենք՝ ոչ, քանի որ ՌԴ ներկայիս դեկլարությունը հետխորհրդային տարածքում որդեգրել է միանգամայն նոր քաղաքականություն, որը հիմնվում է ոչ թե պատմական հիշողության, այլ պրագմատիկ շահերի վրա, և ներկայում Կրեմլին անհրաժեշտ են ոչ թե ժամանակավոր ուղեկիցներ, այլ վստահելի գործընկերներ: Այդ պատճառով ընթացիկ շրջանում Մաքսային միությունում Մոսկվայի համար կարևորվում է ոչ թե էներգակիրներով հարուստ սահմանակից Ադրբեջանը, այլ Հայաստանը: Թուրք քաղաքագետ, «Յաշար» ինստիտուտի միջազգային հարաբերությունների բաժնի գիտաշխատող Էմրե Իզերին գտնում է, որ «ինչպես Մերձավոր Արևելքում ԱՄՆ-ը որպես իր ռազմավարական հենակետ դիտարկում է Իսրայելին, այնպես էլ Ռուսաստանը տարածաշրջանում դիտարկում է Հայաստանին: Թուրք-ադրբեջանական ինտենսիվ հարաբերությունների և Ադրբեջանի հսկայական ռազմական բյուջեի ֆոնին՝ զարմանալի չէ, որ Ռուսաստանն ընդլայնում է իր ռազմավարական ներկայությունը ռազմավարական դաշնակցի տարածքում: ՌԴ-ն և Թուրքիան Հայաստանի հարցում հակասություններ ունեն, իսկ ադրբեջանական կողմի համար հարված կլինի, եթե Հայաստանը Մաքսային միության երկրների, ինչպես նաև Վրաստանի հետ իր առևտրային հարաբերություններն ավելի ինտենսիվ դարձնի»¹: Մոսկվան իրատեսորեն է գնահատում իրավիճակը և ոչ մի պատրանք չունի այն հարցում, որ Բաքուն հեռացել է իր ազդեցության շրջանակներից և մոտակա ժամանակներում նրան

¹ Эксперт: Россия рассматривает Армению как стратегический опорный пункт, www.az/news_ekspert_rossiy_99586.html

«վերադարձնելը» իրատեսական չէ: Այդ պատճառով և՛ Ռուսաստանը, և՛ Ադրբեջանը փորձում են իրենց հարաբերությունները կառուցել փոխշահավետ համագործակցության հենքի վրա: 2013թ. ապրիլին Ի.Ալիևը նշեց, որ «1990-ական թվականների վերջերին և այս դարի սկզբներին Ադրբեջանի առջև ծառացած ամենամեծ խնդիրներից էր ադրբեջանական նավթի և գազի տեղափոխման ուղիների դիվերսիֆիկացիան, քանի որ Ադրբեջանի բարենպաստ դիրքն առանց ենթակառուցվածքների առկայության էական նշանակություն չունի, և Ադրբեջանը ելք չունի դեպի բաց ծով: Մենք կարողացանք հաջողությամբ լուծել այդ խնդիրը, և այժմ առկա են 7 նավթային ու գազային խողովակաշարեր, որոնք ադրբեջանական նավթը և գազը տեղափոխում են միջազգային և եվրոպական շուկաներ»¹: Չնայած Ռուսաստանին չհաջողվեց Ադրբեջանին համոզել, որ ընդգրկվի իր նախաձեռնությամբ ստեղծված այնպիսի տնտեսական և ռազմաքաղաքական կառույցներում, ինչպիսին են Եվրասիական տնտեսական միությունը, Մաքսային միությունը, Եվրասիական տնտեսական ընկերակցությունը և ՀԱՊԿ-ը, այնուամենայնիվ, Մոսկվան կարևորում է Բաքվի հետ գործնական և փոխշահավետ համագործակցության խորացումը և ներկայիս վարչակարգի պահպանումը:

Ռուս հայտնի գիտնական, քաղաքագետ Վ.Պանտինը գտնում է, որ տարածաշրջանում Մոսկվայի համար հիմնական «գլխացավանք» հանդիսանում է Ադրբեջանը, որը Վրաստանի համեմատ «պակաս ժողովրդավար» է, և այնտեղ մեծ ազդեցություն ունեցող ԱՄՆ-ը և Թուրքիան կարող են ծրագրել «գունավոր հեղափոխություն»: Այդ պատճառով Ռուսաստանը պետք է հետևի Ադրբեջանի ներքաղաքական զարգացումներին և թույլ չտա ապակայունացում [10, c. 188]:

Ռուսական գործարար շրջանները ներկայացնող ՎՏԲ բանկի խորհրդի նախագահ և գործադիր տնօրեն Անդրեյ Կոստինը 2013թ. ապ-

¹ В Баку состоялся Всемирный экономический форум на тему “стратегический диалог о будущем Южного Кавказа и Центральной Азии”, www.turkelpress.com/?p=12668

րիլին Բաքվում կայացած Համաշխարհային տնտեսական ֆորումում հայտարարեց, որ «անվտանգության հարցը տարածաշրջանում ամենակարևոր խնդիրներից է... մեր մոտեցումն այն է, որ տարածաշրջանային երկրների հետ ինտեգրման հարցերում մենք կարող ենք օգտագործել բազմաթիվ մոտեցումներ: Մենք արդեն Մաքսային միության մեջ ենք այնպիսի երկրի հետ, ինչպիսին Ղազախստանն է: Այլ երկրների հետ մենք կարող ենք իրականացնել ավելի ցածր մակարդակի և ավելի փափուկ համագործակցություն: Հնարավոր է, որ հետագայում համագործակցությունը նրանց հետ ընթանա այլ ուղղությամբ և, քանի որ տարածաշրջանի երկրները գտնվում են զարգացման տարբեր մակարդակներում, այդ պատճառով էլ նրանց հետ համագործակցությունը ևս կարող է տարբեր մակարդակներ ունենալ»¹:

Նման տրամաբանության շրջանակներում է ընթանում նաև ՌԴ-ԱՀ ռազմատեխնիկական համագործակցությունը, երբ Ադրբեջանին տրամադրվեց \$1 մլրդ-ի սպառազինություն, որը Երևանի կողմից միանշանակ չընկալվեց: Ռուս-ադրբեջանական հարաբերությունների ջերմացումը և ՀԱՊԿ անդամ երկրի հակառակորդ պետությանը \$1 մլրդ-ի զենքի վաճառքը հետապնդում էին ևս մեկ նպատակ, այն է՝ «ակնարկել» Երևանին, որ ավելի շրջահայաց լինի եվրաինտեգրման հարցերում: Չնայած ներկայում ադրբեջանական իշխանությունները գտնում են, որ իրենց մասնակցությունը եվրասիական ինտեգրացիոն գործընթացներին էական «շահույթ» չի բերի, սակայն տեսականորեն հնարավոր է, որ Ադրբեջանը դառնա ՌԴ ռազմավարական դաշնակիցը: Հնարավոր են ռուս-ադրբեջանական ավելի սերտ հարաբերություններ, եթե ՀՀ արտաքին քաղաքականության վեկտորը թեքվի դեպի Արևմուտք, Մոսկվան հրաժարվի Երևանի հետ դաշնակցային հարաբերություններից և համաձայնվի ԼՂ ներկայիս կարգավիճակի փոփոխման հետ: Մոսկվայի Մ.Լոմոնոսովի անվան պետական հա-

¹ Նույն տեղում:

մալսարանում գործող Հետխորհրդային տարածքներում ընթացող հասարակական-քաղաքական գործընթացների հետազոտման կենտրոնի տնօրեն Ալեքսեյ Վլասովի կարծիքով՝ 2013թ. Վ.Պուտինի այցելությունը Բաքու դեռևս չի նշանակում Մոսկվայի համար տարածաշրջանում աշխարհաքաղաքական կողմնորոշումների փոփոխություն, սակայն եթե 2013թ. նոյեմբերին Վիլնյուսում Հայաստանը ԵՄ-ի հետ ստորագրեր Ասոցացման պայմանագիր, ապա այն ժամանակ ՌԴ-ն կկանգնեք ընտրության առջև, թե որ երկրի հետ է առավել շահավետ խորացնել հարաբերությունները: Ա.Վլասովի կարծիքով, եթե Հայաստանը ԵՄ-ի հետ վավերացներ Ասոցացման պայմանագիրը, ապա կպարզվեր, թե որ երկիրն է Մոսկվային մոտ՝ Հայաստանը, թե՞ Ադրբեյջանը, և այդ դեպքում ինչո՞ւ տարածաշրջանում ՌԴ հիմնական գործընկեր չընտրել Ադրբեյջանին¹:

Սակայն Կրեմլում հասկանում են, որ նույնիսկ ռուս-ադրբեյջանական սերտ հարաբերություններն Ադրբեյջանին հետ չեն պահի Թուրքիայի հետ ռազմավարական և ԵՄ-ի ու ԱՄՆ-ի հետ էներգետիկ համագործակցությունից: Ի.Ալիևի նախագահ դառնալուց հետո 2004թ. հունիսի 29-ին ընդունվեց ԱՀ «Ազգային անվտանգության մասին» օրենքը, ՆԱՏՕ փորձագետների մասնակցությամբ մշակվեց և 2007թ. մայիսի 23-ին ընդունվեց Ադրբեյջանի ազգային անվտանգության հայեցակարգը²: 2010թ. հունիսին Ադրբեյջանի խորհրդարանը միաձայն հաստատեց Ադրբեյջանի ռազմական հայեցակարգը: Այս փաստաթղթից պարզ է դառնում, որ Ադրբեյջանի բնական և պոտենցիալ դաշնակիցներ են համարվում Թուրքիան, Վրաստանը, ԱՄՆ-ը, ՆԱՏՕ-ն և ԵՄ-ը, իսկ տարածաշրջանում ԱՀ անվտանգության վրա բացասական ազդեցություն ունի Ռուսաստանը³: Այս փաստաթղթե-

¹ После саммита в Вильнюсе будет ясно, кто ближе России-Азербайджан или Армения?, www.ia-center.ru/publications/16341/

² Рафик Исмаилов, 20 лет независимости: достижения, проблемы и перспективы, irs-az.com/ew/pdf/201110/131832527065798822/pdf

³ Военная доктрина Азербайджанской Республики [Анализ], <http://xpressa.ru/translates/2133-voenaya-doktrina-azerbaydzhanskoy-respubliki-analiz.html>

րում շեշտվում է, որ Ադրբեջանի արտաքին քաղաքականության հիմնարար սկզբունքներից է համարվում բազմակողմանի և հավասարակշռված քաղաքականությունը:

Այսպիսով, Ադրբեջանի հետ ռազմավարական համագործակցության խորացումը Մոսկվայի ակնկալիքները չեն արդարացնի, սակայն ՌԴ-ն կարող է կորցնել տարածաշրջանում իր միակ ռազմավարական դաշնակցին: Վ.Պուտինի 2013թ. օգոստոսյան այցելությունը Բաքու Մոսկվայի հերթական մանևրն էր իր ռազմավարական դաշնակցի և ստրատեգիական գործընկերոջ միջև: Առաջինի դեպքում առաջնային է աշխարհաքաղաքական շահը, իսկ երկրորդի դեպքում՝ շուկայական սկզբունքները: Վ.Պուտինի այցը հաջողված էր այնքանով, որ ռուս-ադրբեջանական հարաբերությունները դուրս բերեց «փոքր սառը պատերազմի» վիճակից, մեղմացվեց Բաքվի դժգոհությունը ՌԴ-ի կողմից Երևանին «միակողմանի» պաշտպանելու քաղաքականության պատճառով¹:

Նման քաղաքականություն ՌԴ-ն որդեգրել էր դեռևս Վ.Պուտինի առաջին նախագահության օրոք, և 2013թ. ՌԴ նախագահի այցելությունները Բաքու և Երևան միայն ամրապնդեցին այդ գործընթացները: Այս տեսանկյունից չպետք է գերազնահատել ՀՀ Մաքսային միության մեջ ընդգրկվելու փաստը: ՌԴ-ն շարունակելու է իր ռազմավարական համագործակցությունը Երևանի հետ, սակայն չի հրաժարվելու նաև Ադրբեջանի հետ համագործակցության ընդլայնումից:

Մոսկվայի միջազգային հարաբերությունների պետական ինստիտուտի Վերլուծական կենտրոնի տնօրեն և միջազգային հարաբերությունների գծով ռուսաստանյան խորհրդի փորձագետ Անդրեյ Կազանցևի կարծիքով՝ «ռազմավարական առումով շատ կարևոր է, որ Ռուսաստանը լավ հարաբերություններ պահպանի Ադրբեջանի հետ, քանի որ Ռուսաստանը կովկասյան ուղղությամբ բավական

¹ expert.ru/2013/08/15/vyigodnaya-druzba/?n=171

խոցելի է, և նա անկասկած շահագրգռված է, որպեսզի Հարավային Կովկասում հավասարակշռություն պահպանի: Այս տեսանկյունից հարավային սահմանների մոտ իրավիճակը վերահսկելու համար անհրաժեշտ է, որպեսզի Ռուսաստանը հարաբերություններ զարգացնի ինչպես Ադրբեյջանի, այնպես էլ Հայաստանի հետ»¹:

Իսկ ի՞նչ գործոններով բացատրել Ադրբեյջանի համընթաց քայլերը դեպի հյուսիս: Գաղտնիք չէ, որ անկախացումից ի վեր Ադրբեյջանի հարաբերություններն ավելի համաչափ էին զարգանում Թուրքիայի, Վրաստանի, Իսրայելի, ԱՄՆ-ի և եվրոպական որոշ երկրների, քան ՌԴ-ի հետ: Այս շրջանում, երբ Երևանը ԵՄ-ի հետ փաստացի ավարտել էր Ասոցացման պայմանագրի վերաբերյալ բանակցությունները և որոշակի սառել էին ռուս-հայկական հարաբերությունները, Մոսկվայում ակտիվացավ ադրբեյջանական լոբբին, բազմաթիվ ռուս քաղաքագետներ և փորձագետներ ԶԼՄ-ում և էլեկտրոնային լրատվամիջոցներում սկսեցին հանդես գալ ադրբեյջանամետ դիրքերից: Բացի այդ, ՌԴ-ն Միոսկի խմբի առանցքային երկրներից է, ինչպես նաև, եթե Մոսկվան «ժամանակին» զրկեր նախագահական ընտրություններում Հ.Ալիևի հիմնական հակառակորդ Ռ.Իբրահիմբեկովին ՌԴ քաղաքացիությունից, ապա դրանով լուրջ խնդիրներ կստեղծեր Ալիևի համար: Բաքուն որոշեց օգտվել վերը թվարկված իրավիճակից, և, ինչպես գիտենք, Վ.Պուտինի աշխատանքային այցից հետո այդ խնդիրները լուծում ստացան:

Մյուս գործոնն այն է, որ Հարավային Կովկասում Ադրբեյջանի ռազմավարական գործընկեր Վրաստանը, որը նաև Ադրբեյջանի համար կարևոր տարանցիկ երկիր էր, փորձում էր հարաբերությունները կարգավորել Մոսկվայի հետ: Բացի այդ, օբյեկտիվ և սուբյեկտիվ պատճառներով տարածաշրջանում թուլացել էր մյուս ուժային բևեռ-

¹ Эксперты: отношения Москвы и Баку потеплеют, но перерыва не будет – ria.ru/politics/2013083/956104515.html

ների ազդեցությունը: Փոխարենը՝ գիտենք, որ 2013թ. բավական ակտիվ գործում էր Մոսկվան: Պատահական չէ, որ Արևմուտքի որոշ լրատվամիջոցներ Վ.Պուտինին համարեցին 2013թ. ամենաազդեցիկ քաղաքական գործիչը: Բաքուն չէր կարող հաշվի չառնել այդ հանգամանքները և չփորձել հարաբերությունները ջերմացնել Մոսկվայի հետ: Մեր կարծիքով՝ Բաքվում Մոսկվայի բոլոր սպասումները չարդարացան: Վ.Պուտինի այցն ավելի շատ քաղաքական էր, քանի որ այն պայմանագրերի համար, որոնք ստորագրվեցին երկու կողմերի միջև («Ռոսնեֆտ»-ի և SOCAR-ի, երկու երկրների Արտակարգ իրավիճակների նախարարությունների, Սամուր գետի վրա ավտոմոբիլային կամրջի կառուցման, ինչպես նաև մինչև 2015թ. հումանիտար համագործակցության վերաբերյալ) նախագահների ներկայությունը պարտադիր չէր: Կարևոր է ընդգծել նաև այն փաստը, որ վերջին տարիներին Բաքվի ռազմատենչ հայտարարությունների ֆոնին Վ.Պուտինը նշեց, որ ԼՂ հակամարտությունը կարող է լուծվել միայն քաղաքական մեթոդներով: Հատկանշական է, որ հանդիպման ժամանակ չոշափվեցին Գաբալայի ՌՏԿ, հոկտեմբերին Ադրբեջանում կայանալիք նախագահական ընտրությունների և տարածաշրջանում ԱՄՆ և ԵՄ դերակատարման հարցերը:

Այսպիսով, կարգավորելով հարաբերությունները Ռուսաստանի հետ և Մոսկվայի հետ հարաբերություններում պահպանելով որոշակի խաղի կանոններ՝ Ադրբեջանը փորձում է հավասարակշռել իր արտաքին քաղաքականությունը՝ միաժամանակ չդադարեցնելով ռազմավարական և էներգետիկ համագործակցությունն Արևմուտքի հետ: Ներկա շրջանում ռուս-ադրբեջանական հարաբերությունների հեռանկարն էականորեն կախված է ԼՂ հակամարտության կարգավորման գործընթացում ՌԴ խաղացած դերից: Իր հերթին, պաշտոնական Երևանը պետք է արագ արձագանքի տարածաշրջանային գործընթացներին և նկատի ունենա, որ իր գործողությունները սահ-

մանափակված են ոչ միայն ավանդական կամ աշխարհագրական գործոններով, այլև այն «համեստ» ուշադրությամբ, որ իր նկատմամբ դրսևորվում է Արևմուտքում:

Ամփոփելով վերը շարադրվածը՝ կարող ենք փաստել, որ Հարավային Կովկասում Ռուսաստանի համար Ադրբեջանը կարևորվում է քաղաքական, տնտեսական և անվտանգային տեսանկյուններից:

Տարածաշրջանում Ադրբեջանը Ռուսաստանի համար կարևոր ռազմավարական գործընկեր է հանդիսանում, որի հետ հարաբերությունների խորացումը բխում է երկու երկրների շահերից, և այս պարագայում «հայկական գործոնը» չի կարող որոշիչ լինել: Մոսկվան շահագրգռված է Բաքվի ներկայիս իշխանությունների հարաբերական կայունությամբ, և տեսանելի ապագայում ռուս-ադրբեջանական հարաբերությունների սկզբունքային վատթարացում չի կանխատեսվում:

Չնայած ադրբեջանական նավթի արդյունահանման նվազման միտումներին, այնուամենայնիվ, գտնվելով էներգակիրների տեղափոխման հանգուցային խաչմերուկներից մեկում՝ Բաքուն կարող է հանդիսանալ Մոսկվայի ինչպես մրցակիցը, այնպես էլ գործընկերը:

Նկատի ունենալով Մերձավոր Արևելքում վերջին շրջանում ընթացող բարդ և հակասական աշխարհաքաղաքական զարգացումները և Իրանի Իսլամական Հանրապետության արտաքին քաղաքականության նոր մարտավարությունը՝ Ադրբեջանը վերստին կարևորվեց Մոսկվայի համար, և ՌԴ քաղաքականության ուղեգիծը՝ թե՛ ռազմական, թե՛ քաղաքական, և՛ Երևանի, և՛ Բաքվի հետ համագործակցության խորացումն է:

Փետրվար, 2014թ.

Աղբյուրներ և գրականություն

1. Гусейнов В.А., Каспийская нефть. Экономика и геополитика, М., ОЛМА-ПРЕСС, 2002.

2. *Дарабади П.*, Кавказ и Каспий в мировой истории и геополитике XXI века, М., Изд-во “Весь Мир”, 2010.
3. *Гаджиев К.С.*, “Большая игра” на Кавказе. Вчерашнее, сегодня, завтра, М., Международные отношения, 2012.
4. *В.В. Путин*, Россия на рубеже тысячелетий, Независимая газета, 30 декабря 1999г.
5. Зеркало, 9 апреля 2013.
6. *Ольга Алпенова*, В. Европу по-грузински, Власть, № 43, 4 ноября.
7. *Вершинин Л.Р.*, Россия, которую мы догоняем, М., Алгоритм, 2013.
8. *Нарочницкая Н.А.*, Россия и русские в современном мире, М., Эксмо-Алгоритм, 2011.
9. Ազգ, 17 դեկտեմբերի 2013:
10. *Пантин В.И.*, Мировые циклы и перспективы России в первой половине XXI века: основные вызовы и возможные ответы, Дубна: феникс+, 2009.

ՌՈՒՍԱՍՏԱՆԻ ԴԱՇՆՈՒԹՅԱՆ ԵՎ ԱՂԲԵՋԱՆԻ ՀԱՆՐԱՊԵՏՈՒԹՅԱՆ ՓՈԽՀԱՐԱԲԵՐՈՒԹՅՈՒՆՆԵՐԻ ԶԱՐԳԱՑՄԱՆ ԴԻՆԱՄԻԿԱՆ 2013Թ.

Մարութ Վարդապարյան

Ամփոփագիր

Մերձավորարևելյան և Հարավկովկասյան հակամարտությունները նոր մարտահրավերներ և սպառնալիքներ են ուրվագծում կասպյան ավազանում: Հարավային Կովկասի, Թուրքիայի և Իրանի հետ սահմանակցող ՌԴ-ն, ինչպես նաև ԱՄՆ-ը և ԵՄ-ն իրենց շահերն ունեն Ադրբեջանում, որը կարևոր տեղ է զբաղեցնում եվրասիական միջանցքում և հարուստ է էներգակիրներով: Ադրբեջանը, ամրապնդելով ռազմավարական գործընկերությունը Թուրքիայի և զարգացնելով հարաբերություններն Արևմուտքի հետ, միաժամանակ ձգտում է բարելավել նաև հարաբերությունները ՌԴ-ի հետ, որի հետ համագործակցությունն ընթանում է առևտրատնտեսական, ռազմատեխնիկական, ինչպես նաև էներգետիկ և հումանիտար ոլորտներում:

ՌԴ ներկայիս իշխանություններն իրենց հերթին հետխորհրդային տարածքում միանգամայն նոր քաղաքականություն են վարում, որը հիմնված է պրագմատիկ շահերի վրա: Մոսկվան սթափ է գնահատում իրավիճակը և հասկանում է, որ Ադրբեջանը դուրս է եկել իր ազդեցության շրջանակից, և որ մոտ ապագայում իրական չէ Ադրբեջանի անդամակցությունը ՌԴ-ի կողմից ստեղծվող տնտեսական և ռազմաքաղաքական կառույցներում: Դրա համար էլ թե՛ Ռուսաստանը, թե՛ Ադրբեջանը փորձում են իրենց փոխհարաբերությունները կառուցել փոխշահավետ համագործակցության սկզբունքով:

2013թ. օգոստոսին Վ.Պուտինի Ադրբեջան կատարած այցը Մոսկվայի հերթական մանևրն էր ռազմավարական իր դաշնակցի և գործընկերոջ հետ հարաբերություններում: Ռուս-ադրբեջանական հարաբերությունները դուրս բերվեցին «փոքր սառը պատերազմի» վիճակից, փափկեց Բաքվի դժգոհությունը ՌԴ-ի կողմից Երևանին «միակողմանիորեն ցուցաբերվող» աջակցության քաղաքականությունից:

ДИНАМИКА РАЗВИТИЯ ОТНОШЕНИЙ МЕЖДУ РОССИЙСКОЙ ФЕДЕРАЦИЕЙ И АЗЕРБАЙДЖАНСКОЙ РЕСПУБЛИКОЙ В 2013Г.

Марут Вардазарян

Резюме

Конфликты на Ближнем Востоке и Южном Кавказе выявляют новые вызовы и угрозы в Каспийском бассейне. РФ, которая граничит с Южным Кавказом, Турция и Иран, а также США и ЕС имеют свои интересы в Азербайджане, занимающем важное положение в евразийском коридоре и богатом энергоносителями. При этом Азербайджан, укрепляя стратегическое партнерство с Турцией, укрепляя и развивая отношения с Западом, одновременно стремится улучшить также отношения с РФ. Сотрудничество с РФ происходит в торгово-экономической, военно-технической, а также энергетической и гуманитарной сферах.

Нынешние власти РФ ведут на постсоветском пространстве совершенно новую политику, которая основана на прагматических интересах. Москва трезво оценивает ситуацию и понимает, что Азербайджан вышел за рамки ее влияния и что в ближайшем будущем нереально вступление Азербайджана в создаваемые РФ экономические и военно-политические структуры. Именно поэтому и Россия, и Азербайджан пытаются строить свои взаимоотношения по принципу взаимовыгодного сотрудничества.

Визит В.Путина в Азербайджан в августе 2013г. стал очередным маневром Москвы в отношениях со своим стратегическим союзником и партнером. Он вывел российско-азербайджанские отношения из ситуации «маленькой холодной войны», смягчил недовольство Баку политикой «односторонней» поддержки Еревана Российской Федерацией.

DEVELOPMENT DYNAMICS OF RELATIONS BETWEEN RUSSIAN FEDERATION AND AZERBAIJANI REPUBLIC IN 2013

Marut Vardazaryan

Resume

Conflicts in the Middle East and South Caucasus bring new challenges and threats for the Caspian region. Russia (that borders South Caucasus), Turkey, Iran, as well as USA and EU have their own interests in Azerbaijan, which is located at an important place in the Eurasian corridor and is rich with energy resources. While strengthening strategic partnership with Turkey and bolstering and developing relations with the West, Azerbaijan also tries to improve relations with the Russian Federation. Azerbaijan cooperates with Russia in trade/economic, military/technical, energy and humanitarian areas.

In turn, the current Russian government implements completely new policy in the post-Soviet space, based on pragmatic interests. Moscow rationally assesses the situation and understands that Azerbaijan is out of its sphere

of influence, and that in the near future it is not realistic to expect Azerbaijan join the economic and military/political structures created by Russia.

V. Putin's visit to Azerbaijan in August 2013 was another maneuver of Moscow in relations with its strategic partner and ally. This visit may be considered a success in terms of bringing the Russian-Azerbaijani relations out of a "small cold war" situation, and easing Baku's discontent with Russia's "one-sided" support to Yerevan.